

Nzryr-krbz Pol Mz Lr Efiszs Natq Ngr Nzaplxtqngr Mz Nzryr-krbz Pol Mz Lr Efiszs

Aposol Pol yrle letz lc mzli kc tqmnc-ngrde mz presin mrkc Rom. ☆ Yrle mz mzliir yiz 60—62 AD mz nibr nzrmcng mz Jisz. Mzli lc yrkzpze letz mz Filimon, lr Kolosia, x lr Filipae. Letz lcng amrlx dzbede esz' kx nzyrng mz presin. Yrbzle letz lc mz kxnzrlxngiting kxtrngiulrJiu kcng tzmncng Provins kc Esia, mz taon kc Efisz, yc-aepztrpz mz taon kcng Kolosia x Laodisea. Mzli ka mrlcde nzrpipebz kandre kc Trki.

Pol tryrleu letz lc mz nzatubqti-krde drtwr kx vz-rbr, a' mz nzpipx-krbzle da kxmrlzting amrlx kcng tqkam Gct bagu mz nzaxvctr-krbzku mz Mrlxde. Mz nzvz-nqblq-krqu lrpzki rde x nzmncz-krbzku mz zmatq ngrde, zmatq lc ycpxm bagu, murde na-aovxioku alwx x Setzn badr drka' nedeng.

Mrkng Mz Letz Lc

Da kxmrlzting kcng tzvzpxmqng mz nzaxvctr-krbzku mz Kraes. [1:1—2:10]

Kxnzrlxngiting amrlx dzbede kxes' mz nzaxvctr-krbzlr mz Kraes, kxmule-esz' lr Jiu o kxtrngiulrJiu. [2:11—3:21]

Nqm q krdr x nzmnc-krdr natakitrde nzngini-krdr doa neng Gct. [4:1—6:9]

☆ : Aposol 28:30-31

Nayrlqzbzku dalr vea amrlx kcnq tqkam Gct bagu, murde natu-amqngi-nrggu, mzli kc tqvecku badr Setzn. [6:10-20]

Pol ayrkrpxle letz lc mz natq ngr nzarlr-lzbqngr. [6:21-24]

Mz letz lc Pol pipx-kzpzle nzymne-ebzpxngr tq mz nzmnc-krqu badr Kraes:

Nigu lrmakxtr nrkrdrdq Kraes x nide nargu. [1:22-23; 4:15-16]

Apuku ma nyz Gct kc tqtr, tqmncpx-ngrm Mqngkrxtr, x Jiszs nide nou rplz kx myatxpx-zlwzbz mz ma lc. [2:21-22]

Jiszs apule ncblo kxyrlz x nigu lrmakxtr apuku olvz rde kc tqmrlzti-zlwzle. [5:23-32]

¹ Ninge Pol kc tqmcpq Gct mz nzngini-krnge aposol ne Mevalu Jiszs. Ryrbo bamu leplz kxnztr neng Gct kcnq tzmncng Efiszs, x tzvz-nqblq-angidrlr Mevalu Jiszs.

² Krka'-ngrbo mz Gct, Trtegu badr Kxetu rgu Jiszs Kxnzmcpq, kx nakabzlr bamu zmrlz ngrdr kxmyalz x nzmnc-zpwxngr.

Da Kxmrlzting Kcnq Tzvzpxmqng Mz Nzaxvctr-krbzku Mz Kraes

³ Na-awibzku mz Gct, kc tqngi Trte Kxetu rgu Jiszs Kxnzmcpq. Murde mz nzaxvctr-krbzku mz Kraes, Gct kc Heven kapemle bagu da kxmrlzting amrlx elr, mz nzokatr-krde nabzgu mz nzmncngr kxtr.

⁴ Murde mzli kc nrlc trnzwzka-ngrde, mcpq-pele nigu mz nzngini-krqu leplz nedeng x mz nzaxvctr-krbzku mz Kraes, murde nanginigu leplz kxnztrng kxnztubqng mz nzobq-krde.

⁵ Mz nivz lrde, pnzpe kai drtwr Gct kx naotile nigu mz nznigini-krngu doa angidr nedeng mz Jiszs, murde mrlzبز bade.

⁶ X naglqlz-ngrngu nide zmrlz ngrde kxmyalz-esz'ngr, kc tqka-nrbalqmle bagu mz nzaxvctr-krbzle nigu mz Mrlxde Kxnmrlzti. ✧

⁷ Jiszs xpele nigu mz mepyr ngrde mz nzarlapx-krde nigu mz zmatq ngr alwx. X dekc tqipqngr Gct nigu mz alwx rgung, mz nzvz-nqblq-krde zmrlz ngrde myalz-esz'ngr.

⁸ X pulio-ebir-ngrmle zmrlz ngrde lc bagu, mz nzvz-nqblq-krde nzetukr nzyrplapx-krde x nzrkrlz-krde.

⁹⁻¹⁰ X mzli ka abrtzlvz Gct nzaelwapx-krmle bagu drtwr kxmyapxbz kc tqyrlq-kaile mzli kc bqnc, tqyc-kapqbz mz kxnzung amrlx krlzmle mzli ka. Kraes nide nou drtwr lc x atutrl. Murde mz nzkrzl-krbzle mzli kx mcpx Gct, Gct sa nayrlwr-lxblrlle mz dzbede kxes' kxnzung amrlx mrkc Heven x mz nrlc ka, murde namnclzbzng mz Kraes kc nangi nardr.

¹¹ X mcpx Gct nigu x yrlq-pnzle drtwr kx nanginigu doa nedeng mz nzaxvctr-krbzku mz Kraes. X Gct batrpzle da amrlx kx prtzm mz nzvz-nqblq-krde nzyrplapx-krde mz drtwr kc tqyrlqle.

¹² Murde nigr lr Jiu, mz nzbtri-kaikr drtwrgr Kraes, nabatrpzkr mz leplz nzglqpx-krdr Gct.

¹³ X nimu kxtrngiulrJiu nzaxvctrpe-kzpzmu mz Kraes, murde mzli kc tqxlr-ngrnamu natq angidr, sc tqlxngitipe-kzamu Nrpakxmrlz lc. X mz nzbtrtkr drtwrmu Kraes nzarlapx-krde nimu,

✧ 1:6 Matiu 3:17

Gct sc tqyrlqtrpebzle bamu rkk ngr nzngini-krmu leplz nedeng. Krlc Mqngrkxtr kc tqpipx-pnzle kx nakabzle mz leplz nedeng.

¹⁴ Mqngrkxtr apule trau kx nzka kai mz nzael-wapxngr kx sa naka-kzle da amrlx kcng tqesalz-ngrde. Murde Gct ka-kaipzle Mqngrkxtr mz nzaelwapx-krde kx sa naka-kzpzle da kxmrlzting amrlx kx nzvzpxmqng mz nzngini-krngu leplz nedeng. Murde naglqpxku nide mz nzmrlzkr nqm q krde.

Pol Krka'-ngrde Lr Efiszs Kxnzrlxngiting

¹⁵⁻¹⁶ Mz nztwz-krngu da kxmrlzting lcong, sc tqkrka'pe-ngrne nimu, abzo mzli kx xlrk kx brtipe drtrmu Kxetu rgu, Jiszs Kxnzmcpx, x mrlztiamu leplz kxnztrng ne Gct amrlx. X awi-zvz-ngrbo mz Gct nimu.

¹⁷ Gct nide Trte Kxetu rgu, Jiszs Kxnzmcpx, x nqm q krdeng amrlx myapx zlwz. X rlxti-zvzbo mz Gct kx nzyrplapxngr x nzkrlzng kx kabz Mqngrkxtr naetunepx-zvzng mz nabzmu, murde nzkrlz-krmu Gct naetunepx kz.

¹⁸ X nakrlz-kzamu da kxmrlzting kx nakabzle bamu. Murde sa nakabzle da lcong, tqobqtipxamu, mz nzkqle-krde nimu mz nzngini-krmu leplz nedeng. X krka'-ngrne kx nakrlz-angidramu kx nzngini-krmu leplz nedeng ngi da kxmrlz kxmyapxbz mz nabzde.

¹⁹⁻²⁰ X krka'-ngrne kx naxngi-angidramu zmatq ngrde kxetu-esz'ngr kc tqwz zvz mz nabzgu, mz nzngini-krngu kxnzrlxngiting. Murde mz zmatq kcpwz tqatulz-mou-ngrm Gct Jiszs mz nzbz-krde,

x dekcpxwz tqawxbuo-ngrmle nide me matq-esz'ngr mz nrlar Gct kxrtrc kc Heven. ☆

²¹ X mz nzaclve-krde kc Heven, Jiszs myaszlz-zlwzle kxnzeturung amrlx kxmule-esz' mz nrlc ka o mzlilxlr. Myaszlzle nidr mz nzxplr-krde, zmatq ngrde, zmlrue ngrde, x drtqde, kxmule-esz' mzli ka o mzli kc navzm. *

²² X Gct yrllqzbzle doa x da amrlx mz zmatq ngr Kraes, ☆ (kxmule-esz' leplz, enjrl, drka', animol, o da kxtrnzluung), mz nzmety-krbzlr bade. ☆ Murde nanginide nar leplz amrlx kcng tzprtrng mz lrmakxtr.

²³ X lrmakxtr lcng nzaesz'tilr nide, murde nide nardr x nidr nrkrdrdqde. X nide kc tqesz'-ngrde da amrlx.

2

Nzlungr Vzpxm Mz Nzaxvctr-krbzku Mz Kraes

¹ A' mzli lc trlxngitikalamu Kraes, mqngrmu bz, murde vz-rbr-zvzamu mz nzale-krmu alwx.

² X mzli lcde, apuamu kxnzmnc-mrbrng mz nrlc, mz nzvz-nqblq-krmu Setzn, kc tqngi kxetu r drka' amrlx kcng tzmncng mrnyzdr mzlilxlr.

☆ **1:19-20** Sam 110:1 * **1:21 1:18** Kzdung leplz mz drtwrdr natq lc tqrmnr-ngrbz natekqtr-kzlr mz nzrpi-krde kx, 'Krka'-ngne kx nakrlz-angidramu nzeturk da kxmrlzting kx nakabzle bamu.' **1:21** Mz mzli nyz Pol, leplz nzrpir kx enjrl x drka' nzaclveng badr kxnzetu ngr kandre x mztea amrlx. X nzota-etrng mz nztwz-krdr leplz mz nrlarde nyz Gct o Setzn. krkcng tzaovxiolr mrnyzdr batrpzle da mz nrlc ka. Kzdung Kristin nzlxngiti-kzlr drtwr lc, mz nzrlwx-krdr Daniel 4:25 x 10:13. Mc kz Hibru 2:5. ☆ **1:22** Sam 8:6 ☆ **1:22** Sam 110:1

X nide kc tqvz zvz nzbatr-krbzle mz leplz nzxpqbrlr-krdr Gct.

³ Mzli lc tqmnc-nqblq-kzkr nqm q nr drtwr kxtrka kcng tqyclzm mz nabzgr, mz nzrtrngzti-zvz-krbzkr da kznikeng mrlzm bagr. Nigr leplz kxdrka'-ngrng mz nzapu-krgr leplz amrlx, x takitrde Gct nzayrplapx-krde nigr mz zngya ngr drtwrde.

⁴ Kxmule-esz', a' Gct yc zlwz mz drtwrde nigu leplz amrlx, murde aodu-zlwzle nigu.

⁵ Mzli lcde mqngrgu bz mz nzale-zvz-krgru alwx, a' Gct sc tqalupemle mqngrgu mz nzaxvctr-krbzle nigu mz Kraes. Arlapxle nigu mz nzvz-nqblq-krde zmrlz ngrde kxmyalz.

⁶ X mz nzaxvctr-krbzku mz Mevalu Jiszs, Gct atulz-kzple nigu mz nzbzng, x wxbuo-kzku badr me matq Heven. *

⁷ Alele da lc murde mzli kc navzm na-aelwapx-angidr-ngrbzle nzetukr zmrlz ngrde kxmyalz-esz'ngr, mz da kx mrlzting amrlx kcng nzvzpxmqng mz nzaxvctr-krbzle nigu mz Kraes.

⁸⁻⁹ Murde nzrlapx-krmu vzpxm mz zmrlz ngr Gct kxmyalz, mz nzokatr-krde nimu mz nzabrtr-krbz drtwrmu mz Kraes. A' nzrlapxng lc trvzpxpuu mz nimu esz'-krmu. A' Gct kx rka-nrbalqzb bamu, murde ma tqglqpx-lzbq-ngrnamu kx wz-ngrnamu da lc mz zmatq ngrmu esz'-krmu.

¹⁰ Gct wz-ngrde nigu mz nzmnc-krgru mz nrlc ka mzli ka. X alule mqngrgu mz nzaxvctr-krbzle nigu mz Mevalu Jiszs. X mzli kc pnz, yrlqle

* **2:6** Drtwr lc angidatile mqngr kxnzrlxngiting mzli ka x nrkrdrtdr kx mrna Heven kalr.

drtwr mz da kxmrlzting kx suti drtwrde nzale-krguleng.

Lr Jiu X KxtrngiulrJiu Nzngini-krdr Dzbede Kx Esz' Mz Kraes

¹¹ Nimu kxtrngiulrJiu nadcp^x mz drtwrmu kx mzli kc pnz, nzrpi lr Jiu nimu kxtrnzpakrung, a' nidr kxnzpakrng mz nzvz-nqblq-krdr Loukxtr. Nzrpakrng^r lc dalr nrkrdr^{tq}, a' tr-rngiscu zmatq ngr nztekqtr-krde nabz leplz.

¹² Mzli lcde, nzmnc-krmu trka, murde mnc-rlrubzmu mz Kraes. X ni-kzpu' lr mrkzbleng murde trpnzng^r nzprtr-krmu mz nqvi lr Israel, leplz kcng tqmcp^x Gct. X trprtr-kzpwamuu mz Nzes'tikr Drtwrdr badr. X trpnz-kzng^r nzkr^l-krmu Gct angidr x drtwrmu kc tqmatxpe nzobqtipxng^r da.

¹³ A' nimu kcng ena nzmnc-rlrubzng^r mz Gct, mzli ka vec-aepztrpeme^r nimu bade, mz mepyr ngr Kraes kc tqyrleo^r mz nzbz-krde nimu.

¹⁴⁻¹⁵ X Kraes batrpzle nzmnc-lxblr-kr^gu mz nrw^x, nimu kxtrngiulrJiu x nigr lr Jiu. Kzdung natq x nqm^q x nzryr-ngrng^r mz Lou sc Mosis nza-pulr drkq^r kx akipxle nigu x batrpzle nzngyati-lzbqkr drtwrgu. A' Kraes awxole drkq^r lc, x sc tqmape lou lcng^r mz nzrlrpx-krbzle nrkrdr^{tq}de nzbz-krde nigu, murde nanginigu dzbede kxesz' kxm^rna mz nzaxvctr-krmle nigu bade. Delc nide nou nrw^x ngr^g.

¹⁶ Murde yzlumi-kzpzle nigu mz Gct mz dzbede kc esz' mz nzbz-krde nigu mz kros. X mz nznribqng^r Kraes, awxobzle zngya kx yc mz

mzlr nigr lr Jiu x nimu kxtrngiulrJiu, murde namnc-zpwx-ngrgu badr Gct. †

17 Kraes vzm mz nzryapwxtipx-krde lrpzki r nzmnc-zpwxngr badr Gct. Pibzle bamu, nimu kxnmnc-rlrubzng mz Gct, x pi-kzple bagr, nigr kxnmnc-aepztrpzng bade. ☆

18 Murde mzli ka, mz nzwzkr Kraes, nigu amrlx ngrgu nzaxvctrpzng mz Mqngrkxtr kcpwz, kxmule-esz' lr Jiu o kxtrngiulrJiu, x takitpegu nztutr-krbzkz mz mz Gct Trte.

19 Mz nzm-krde lcde, nimu kxtrngiulrJiu trpengr nzngini-krmu lrnarnrlc x doa lr mrkzble. Murde mzli ka nipemu lr mztea nyz Gct badr leplz kxnztr nedeng amrlx. X nimu neidu lrde x prtrpe-kzpzmu mz lr ma nyzde.

20-22 X wz-ngrde ma nyzde lc tqtr mz nou rplz kx ngi nzalvztrkr aposol x profet. X Mevalu Jiszs nide rplz lc tqetu tqmyatpx-zlwzbz, murde nide rplz kc tzatuo kai, tqngi nou bute', x atu-amqngile ma kc. X rplz amrlx ngr ma kc nzaxvctrpzng bade. X apuku rplz lcng tqmwitr lxblr, tqngi drkq ngr ma lc tqtr. X Mqngrkxtr mncpxm elr. ☆

† **2:16** 2:14-15 Mwx Pol rpile 'drkq' mz nzaotikr drtwrde drkq ngr Mangr-nzangiongr Yawe kx akipxle kxtrngiulrJiu mz nzprtr-krdr mrnyz lr Jiu. KxtrngiulrJiu nzkrzlzlr nzprtr-krdr mrnyz lr Jiu mz nztekqtr-krdr nzrlxngitingr x mz nzngini-krdr lr Jiu mz nzrpakngr. Lou kxnmulr lcng nzakipxngr leplz. Kzdq rpile kx nzm lr Jiu nzmncng badr kxtrngiulrJiu, sa nabatrpzle mz lr Jiu trnztakitrdeu nzprtrngr mz nzangiongr. Mzli lc pnz, pris neng lr Jiu na-ale-zvzng blz, murde Gct naipqpxle alwx ngr leplz nedrng. A' mzli ka, sc tqangidatipe Jiszs lou lcng, mz nzngini-krde Nei sip ne Gct, kc tqngi blz kxrmnr-ngrbz. ☆ **2:17** Asaea 57:19

☆ **2:20-22** Sam 118:22

3

Nzwzkr Pol Mz Nzyapwxtipx-krbzle Nrpakxmrlz Mz Leplz KxtrngiulrJiu

¹ Mevalu Jiszs yrlqle ninge nzyapwxtipx-krbo Nrpakxmrlz bamu, nimu kxtrngiulrJiu. X dekc tqmnc-ngrne mrka mz presin, murde alex da lc mz nzokatr-krnge nimu.

² Mwx xlrpeamu kx Gct aprcmle nzwzngr lc bange, murde napipxbo bamu zmrlz ngrde kxmyalz.

³ Krlc da kx yc-kapq pnz kc tqaelwapx-ngrmle bange, da kc tqwai nzyrpe-krbo mz letz ka.

⁴ Mz nzrlwx-krmu letz lc, nakrlzamu nzaotikr drtwrnge drtwr kc tqyrlq kai Gct mz nzarlapxngr leplz mz nzbzkr Kraes.

⁵ Murde traelwapx-ngrpwzleu drtwr lcde badr leplz kcng pnz. A' mzli ka, atwzlr-ngrmle Mqngrkxtr mz aposol x profet kxnztr nedeng mz nzaelwapxpe-krbzlele badr.

⁶ Drtwr lcde tqyc-kapq pnz nide sele. Lr Jiu x kxtrngiulrJiu nipedr dzbede kx esz' mz nzlxngiti-krdr Mevalu Jiszs. X nzprtrng rlilrdr mz da kxmrlzting kcng tqesalz-ngrbz Gct kx navzpxmqng mz nzngini-krdr nrkrdrdq Kraes.

⁷ Mz nzvz-nqblq-krde zmrlz ngr Gct kxmyalz, kamle bange zmatq ngrde, murde nawztrpo bade mz nzyapwxtipx-krnge Nrpakxmrlz.

⁸ Kxmule esz' leplz nedeng amrlx nzmyaszpxlr ninge, a' mz zmrlz ngrde kxmyalz rlr-ngrmle bange nzyapwxtipx-krbo mz kxtrngiulrJiu da

kxmrlzting kx twzku mz Kraes, kx trnzkrlyz me yrkrkipxle. *

⁹ X Gct kc tqwz-ngrde doa x da amrlx, yrlq-kaile drtwr mzli kc bqnc x yrlq-kapqle krlzmle mzli ka. X suti drtwrde kx nayokaetipxpebo mz leplz, kx mzli ka sc tqvzpe nzatutr-krde drtwr lc.

¹⁰ X suti kz drtwr Gct kx nigu lrmakxtr na-aelwapx-ngrbzku nzetukr nzyrplapx-krde mz enjrl x drka' kxnetung kxnzrngiscng zmatq mrnyzdr mzlixl.

¹¹ Da lcng tqale Gct mz nzvz-nqblq-krde me pnz drtwrde kx yrlq-pnzle mzli kc trwzka-ngrde nrlc. X mzli ka angidatipeleng mz nzwzkr Mevalu Jiszs, Kxetu rgu.

¹² X mzli ka trmwxlrepekuu nzvz-krbzku mz Gct mz nzkrka'ngr. Murde krlzku kx abrtzlvzle nigu mz nzabrtr-krbzku drtwrgu mz Jiszs x nzaxvctr-krbzku bade.

¹³ Mz nzmu-krde lcde, bzkq nabzmu talvzo mz nzetqkr drtqnge mz nzyapwxtipx-krbo Nr-pakxmrlz bamu, nimu kxtrngiulrJiu. Murde da kx prtzm bange ngi dalr nzokatrngr nimu.

Pol Krka'-ngrde Lr Efiszs

¹⁴ Mz nzaotikr drtwrnge da lcng tqmrlzting, tzvzpxmqng mz nzaxvctr-krbzmu mz Kraes, atuobo zpr mz nzkrka'-krbo mz mz Gct Trtegu.

¹⁵ Murde nide Trte neidu amrlx kx nzmncng Heven x kx nzmncng mrka mz nrlc ka.

* **3:8** Pol rpilc kx leplz neng Gct amrlx nzmyaszpxlr nide, murde nngitr-zlwzle nzatrkatikr-krde kxnzlxngitilr Jiszs.

¹⁶ Mz da lcnq tqmrlzting, rlxrtibo bade nzka-krbzle bamu zmatq ngr Mqngrkxtr mz nzaxplrkrde nimu navzo la mz nabzmu.

¹⁷ Murde namnc zvz mz nabzmu, mz nzbrkr drtwrmu. X krka'-ngrne kx nivz lr Gct nangi dzbr x nou nzmnc-krmu.

¹⁸ Murde mz zmatq ngrde nakrlz-angidramu nzetukr nivz lr Kraes. Murde nzyryz-krde, nzboi-krde, nzvzo-krde, x nzmyalz-krde tqvzpe tqvzpe.

¹⁹ X krka'-ngrne kx sa naxngibzmu nzetukr nivz lrde mz nabzmu, kxmule-esz' trpnzngr kxrklz angidr. Murde na-aelwapx-zpwx-ngrnamu nivz lrde mz nqm q krmung amrlx.

²⁰⁻²¹ Mzli ka takitrde nzglqlz-krgu Gct. Murde krlzle nzalengr da kx myaszpx-zlwzle da amrlx kx rlxrtibzku bade x myaszpx-kzle da amrlx kx aoti drtwrgu. X alele da lcnq mz zmatq ngr Mqngrkxtr kc tqalu-zvzle nabzgu. Murde nigu lrmakxtr, mz nzaxvctr-krbzku mz Mevalu Jiszs, na-amrlue-zvzku nide, tqvzpe tqvzpe. Eu, angida.

4

Drtwr Kxnzlxngitilr Kraes Naesz'ti

¹ Lalztqمامu bange. Mncpxmc mz presin murde wztrpo mz Kxetu. Naxplrmibz natqnge mz nzpi-angidr-krbo bamu kx nqm q krmu x nzmnc-krmu natakitrde nzqqler Gct nimu mz nznngini-krmu doa nedeng.

² Lrpzki kx navz-nqblqamu nide sele. Avzozlbqamu. Nanginimu leplz ngr nrwx. X bzqk drtwrmu ngya-anibz mz leplz kx nzatrkatilr

nimu. A' mz nivz, rlr-ngrbzmz badr mzli r nztékqtr-krdr nqm̄q nr drtwrdr.

³ Mnc-zvzamu mz nrwx x mz nzesz'tikr drtwrmz mz nzm̄nclz-krbzmz mz Mq̄ngrkxtr.

⁴ Murde nanginigu dzbede kxes'z' mz da amrlx. Prtrku mz nrkrdr̄tq̄ kcpwz. Twzku Mq̄ngrkxtr kcpwz. X obqt̄ipxku da kxm̄rlzting kcpwz mz nz̄k̄ql̄ekr Gct nzn̄gini-kr̄gu leplz nedeng.

⁵ X vz-nq̄bl̄q̄ku Kxetu kcpwz, mz nzrl̄xngitingr kcpwz. X mz dr̄tq̄ Gct kc tq̄ngi Trte, Mrl̄x̄de, x Mq̄ngrkxtr, prtrku mz nzwr̄kxtr̄ngr kcpwz. *

⁶ Angioku Gct kcpwz, tq̄ngi Trte leplz amrlx, tq̄myasz̄lzle nigu amrlx, tq̄m̄ncpxm̄ bagu amrlx, x tq̄m̄cpxle nigu amrlx mz nzale-kr̄gu nzwz-kr̄de.

⁷ Kxm̄ule-esz', a' Kraes kamle bagu zmat̄q̄ ngr nzwz̄ngr kx blet̄ipx-lx̄bl̄rng mz nzwztr-kr̄bzku bade, mz nzvz-nq̄bl̄q̄-kr̄de me pnz drtwr̄de.

⁸ Da kc tq̄pingr Nzryr̄ngrkxtr le, kx mz nzvz̄dzkr Kxetu w̄q̄ aov̄xiole en̄q̄mi kang k̄ql̄u. X kabzle da kxm̄rlzting mz ncblo. ☆

⁹ Mz nzxl̄r-kr̄gu nat̄q̄ lc, 'vzdz w̄q̄,' nakrlz-kzku kx vzo-kaip̄ yu mz nrlc.

¹⁰ Mrl̄x kc tq̄vzom, nide kcpwz tq̄vzdz w̄q̄ me mat̄q̄ esz'ngr, murde naesz'-ngr̄de da amrlx mz nrlc atwr̄nr̄ngr.

¹¹ Nide kcpwz tq̄yrl̄q̄le leplz mz nzwz-krdr murde na-ac̄l̄velr l̄rmakxtr, mz nztwz-krdr nzwzkr aposol, o profet, o kxn̄zr̄lep̄xng Nrp̄akxm̄rlz, o kxn̄zacl̄velr leplz nedeng, o kxn̄zalvztr-ngr̄dr nat̄q̄de,

* 4:5 Mzli kc Pol tq̄yr-ngr̄de letz lc, l̄rmakxtr tr̄pnz̄ngr nza-k̄ipx-lz̄bq̄-krdr mz nzwr̄kxtr̄ngr. ☆ 4:8 Sam 68:18

12 mz nzoliqti-krdr leplz neng Gct murde nawztrpzng bade. X mz nzwz-krdr lcng, sa na-axplrlr leplz kcng tqngi nrkrdrdq Kraes,

13 vz vz mzli kx drtwrgu esz'ti mz nzlxngiti-krdu Mrlx Gct x nzkriz-krdu nide. Murde nzmnc-krdu badr nabr x na-apupwzku Kraes mz nqmqu krdu amrlx.

14 Mzli lcpe nzmnc-krdu trapupeleu doa kxnz-topwzng kx nztekqtr-ebir-ngrdr drtwrdr apule drtwrdr lcng tqtwzne nrc. Doa lcng tztwzlr nza-lvztrngr kzbleng mzli kznikeng nzxlr-ngrdrle, apule da kx tqtwzne nenq. A' trapupekuu nidr, murde mzli ka rblxbz mz kxnzalvztr-rbrng nzesabrti-krdr nigu murde mc-zpwxku nzpokia-krdrng. ☆

15 X mz nzvz-nqblq-krdu nivz angidr, napipx-etrku nzalvztr-ngrng angidr, murde naetunepx-zvzku mz da amrlx mz nzapu-krdu Kraes kc tqngi nargu.

16 X mz nzngini-krde nargu, amwitr-lxblrle leplz nedeng mz nrkrdrdqde, apule neli kxetu kc tqaxvctrle mrkcng kqlu mz nrkrdrdq ncblo. Murde mzli kc doa kxes'z' tqale-zpwx-ngrde nzwz-krde mz nzvz-nqblq-krde nivz lr Gct, doa lc aetunepxle nzxplr-krdu, nigu amrlx mz nrkrdrdq Kraes.

Nqmqu Kr Leplz Neng Gct

17 Mz nzmu-krde lcde, pibo bamu mz drdq Kxetu rgu x mz nzngini-krnge aposol nede, kx

☆ 4:14 Jud 12-13

bzkq apupeamu kxtrnzrlxngitiung, murde nzaoti zvx drtwrdr da kxmane x trpnzngr nrade. †

18 Rblxbz badr nzkrly-zpwx-krdr nzalvztrngr angidr, murde nqmq nr drtwrdr lc tqvz-rbr akamrbr-ngrde da mz nabzdr. X nzpctxpx-ngrdr nzlukr Gct kxmrna murde nardr mqngi x trnzkrlyzru nqmq krde.

19 Trnzclupeung mz da kx myangr drtq, mz nzrlrpx-lzbq-krdr nzvz-nqblq-zvx-krdr da kx mrlzbz mz nrkrdrdqdr. X nzamqmiti-rbrlr nrkrdrdqdr mz nzrmwimi-abeane-krdr leplz kx trngiu kernalzdr. X drtwrdr tresapxu mz nzale-rbr-krdr da lcng.

20 A' nimu, trngiu da kx nzalvztr-ngrmu lc, mzli kc kai tqxlr-ngrnamu Nrpa ngr Kraes.

21 Murde mzli lc tqxlrpe-ngrnamu kx nzmnc-krmu navz-nqblq-zvzle natq angidr kc tqalvztrngr Jiszs.

22 Rpile kx na-axtxpeamu nqmq kcng pnz tqvz-nqblqamu mzli kc trkrlyzka-ngrnamu Gct. Murde nqmq kxdrka'ngr lcdeng nzatrkatilr drtwrmu x nabzmu.

23 A' narlr-ngrbzmu mz Gct nztekqtr-krde nimu, murde nanginimu leplz kxmrna kcng nzaokrmu drtwrmu tqmrna kz.

24 X mz zbq kang kqlu narlrpx-lzbq-ngrnamu mz nzngini-krmu leplz kxmrna, murde navz-nqblq-angidramu Gct x nzmnc-krmu natubq zpwx x nalqngi mz nzobq-krde.

† 4:17 Kzdung da kxmane nidr seleng: nzangio-krm drka', nzmnc-xgle-krm zmatq ngrm esz'-krm, nzvz-nqblq-krm nqmq kr leplz kx nzrpwa-ngrdr nzwzkr Gct, nzpctxpx-krm natq Gct, x kzdung kz da kxnmulr lcng.

25 Mz nzmu-krde lcde, bzkq pokiapebzmu mz kztemung, a' rpi-etramu da angidr. ✧ Murde nigu amrlx ngrgu leplz ngr nrkrdrdq kcpwz.

26 Kzdung zngya ngr drtwr leplz trngiu alwx. A' aclvetio-lzbqm mzli kc tqngyangr drtwrm, ma tqvz-rbrq. ✧ Murde tr-rblxu nzvz-rbrngr mzli kc tqngyangr drtwrm. X bzkq zngya ngr drtwrm boi nzkrly-krbzle nzmwi-krm mz nrlckxbq. ✧

27 A' ipq ani kztem murde ma tqrlr-ngrbzme mz Setzn nzatrkatikrde nabzm.

28 Mrlx kx pna da, bzkq pnape da. A' nawz-kato mz nzatatr-krmle da kx takitrde nide badr lr ma nyzde, vzmi nzokatr-krde nra-nzlu ngr leplz.

29 Bzkq ycmne-atrkatiamu leplz mz nzrpibqti-krmu x nzrlcbqti-krmu nidr. A' rpi-txpwzmu natq kx takitrde nzaxplr-krde nabz leplz neng Kraes, murde na-amrlz-zvzamu krkng tzlaltqng.

30 Bzkq avzbzmu drtwr Mqngrkxtr, murde ma qrblybz bade nzokatr-krde nimu. Murde Mqngrkxtr lc tqmncpxm mz nabzmu ngi rkx ngr nzngini-krmu leplz neng Gct. X nzvz-krde nzokatr-krde nimu nakrlzbzle mzli kc Gct narlapx-atwrnr-ngrde nimu mz zmatq ngr alwx, mz nyzylu-krm Jiszs o mz nzbz-krmu.

31 Naesakiamu nztrngz-ngrbz drtwr kxtrka lcde seleng: nzlolvz-amqngi-krmu zngya ngr drtwrmu kx vz nabu, zngya kxetu, nztalwz-krmu, nzpibqti-krmu leplz, x nzmwatikr drtwrmu leplz.

³² A' nivz lrmu namrlz x naycngr drtwrmu leplz kxnzcxpung x naokatramu nidr. X ipq-lzbxamu, da kc tqwai Gct mz nzipq-krde nimu mz nzaxvctr-krbzmu mz Kraes.

5

¹ Abzamu nzvz-nqblq-zvz-krmu lrpzki r Gct, murde nimu doa nedeng kcng tqmrlzti-zlwzleng.

² Namrlzti-zvzamu leplz, da kc tqwai Kraes nzmrlzti-krde nigu. Murde rlrpx-lzbx-ngrde nzbz-krde nigu, mz nzngini-krde blz kx myapx-esz'ngr kx abrtzlvz Gct.

³ X mz nznginipe-krmu lc leplz kxnztrng ne Gct, nzmnc-krmu natubq-zvzpwz, murde ma tzpikitingr leplz nimu nqmq krmu. Bzkq rwmimiamu doa kx trngiu krnalzmu, x bzkq aleamu da kx myangr drtq, x bzkq trkibramu. Murde nqmq kxnzmulr lcng trtakitrpleu leplz nedeng.

⁴ Murde trtakitr-kzdeu nzryapwx-krmu kxtrka. Bzkq yapwxtipxamu be kx amyale drtq. Bzkq ycmne-lukurnr-ngrnamu x rwxtiamu leplz. A' awi-ngrbzmu mz Gct nivz lrde, mz nzymne-krmu amrlx.

⁵ Leplz kcng tzprtrng mz nzrmwingr leplz kx trngiu krnalzdrng, x mz nzalengr da kx myangr drtq, x mz nzngini-krdr trkibr, leplz kxnzmulr lcng trnamncung Heven badr Kraes x Gct Trte, x trnatwzlr da kcng tzvzpxmqng mz Gct nzngini-krde King rdr. Murde mz nzale-krdr da lcng trnzangiolru Gct angidr, a' nzangiolr nidr esz'-krdr.

⁶ Bzkq rlr-ngrbzmu mz leplz nzesabrti-krdr nimu, mz nzrpi-krbzlr kx Gct rlrpx-ngrde da lcng tqtrka. Murde natq kxnmulr lcng nzvz-rbrng. X zngya ngr drtwr Gct kalr sa natutitrlle leplz amrlx kcng tzxpqbrlr-ngrdr natqde.

⁷ Mz nzm-krde lcde, bzkq prtrpzmu badr, a' kapx-lzbq-zvzmamu badr.

⁸ Murde mzli kc ena, apuamu leplz kcng tzmncng mz nzlo, murde alwx ngrmung nzakamrbr-ngrdr da mz nabzmu. A' mzli ka apupeamu leplz kcng tzmncng mz zyzlr, murde da angidr kx vzpxm mz Kxetu pnamilxtipele nabzmu. Mz nzm-krde lcde, mnc-nqblqamu da angidr lc. ✧

⁹ Murde leplz kcng tzmnc-nqblqlr da angidr lc, nqm q krdr sa namrlz, nalqngi, x natubq.

¹⁰ X abzamu nzkrly-krmu da kx abrtzlvz Kxetu, x vz-nqblqamu me pnz drtwrde. *

¹¹ Kapx-lzbqamamu mz da kxmane kcng tqtrka. X pibzmu mz leplz kx da lcng ngi alwx.

¹² Murde myangr drtq leplz nzryapwxtinengr da kx nyrtrngzti-kapqbz leplz kxdrka'-ngrng.

¹³ A' mzli kc alwx kcng tqyc-kapq tzaelwapx-ngrdr, leplz nakrlzlr da kx ngi drka'-ngrng.

¹⁴ Murde da angidr kx vzpxm mz Gct apule zyzlr kc tqaelwapx-ngrde da kxtubq x da kvz-rbr. Delc, leplz nzng-ngrdr kx,

“Ei! Melzmq! Bzkq mwibqpeq!

A' tulzm mz nzbzngr mzli ka.

X rlr-ngrbz zyzlr ngr Kraes

✧ **5:8** Asaea 9:1-2 * **5:10** Naglxku nike abrtzlvz Gct mz nzrlwx-krqu Nzryrngrkxtr, murde pipxle da kx mrlz bz bade x da kx trkabz bade.

Nzpnamilxti-zvz-krde nabzm.” †

15 Mz nzm-krde lcde, obq-angidramu mz nzmnc-krmu. Bzq apuamu ncblo kxngqngu, a' na-apuamu ncblo kxyrplapx.

16 Oliqti-zvzamu nzamlz-krmu leplz, murde mzli ka leplz kxnzkqlung nzale-txpwzng da kx-trka.

17 Dekc tqrpi-ngrbo bamu kx bzq apuamu ncblo kxngqngu, a' abzamu nzkrz-krmu me pnz drtwr Kxetu.

18 Bzq rlr-ngrbzmu mz nzrmnqngr nzatrkatikrde nimu. Murde nzrmnq-katongr rkatrprz mz leplz nzrtrngz-abeane-krdr da kxdrka'ngr kx myangr drtq. A' rlr-ngrbzmu mz Mqngrkxtr nzokatr-krde nimu, murde narkatrprz bamu nzale-krmu da kxtubq.

19 X mz nzokatrkr Mqngrkxtr, ycmne-etramu badr kztemung mz natq ngr Sam, him, x nabz kxtrng. ✧ X angrlvzamu Kxetu mz nabzmu atwrnrngr.

20 X awi-zvz-ngrbzmu da amrlx mz Trtegu Gct, mz nzngini-krmu leplz neng Kxetu rgu Jiszs Kxzmcpx.

Olvz Kxnzyrlzng X Ncblo Ngrdrng

21 Doa ne Kraes namnclzbz mz zmatq ngr kzt-edeng kxnzrlxngiting mz nzamlrue-krde Kraes.

22 Mz nzm-krde lcde, nimu olvz kxnzyrlzng namnclzbzmu mz zmatq ngr ncblo ngrmung, mz nzmncz-krbzmu mz Kxetu rgu.

† 5:14 Nabz lc nangr-ngrgu mz #110 'Lod, Glqlzkr' mz Buk R Nzangiongr. ✧ 5:19 Kolosia 3:16

23 Kraes nide nargu kx acive-angidrlle nigu lrmakxtr mz nzngini-krge nrkrdrtdqe. X nide kc tqarlapxle nigu. Mz nqm q lcpwz, ncblo kxyrlz nangi nar olvz rde mz nzaclve-angidr-krdele.

24 Mz nzm-krde lcde, nimu olvz narlr-lzbq-ngrbzmu mz nzmncz-krbzmu mz ncblo ngr-mung, da kc tqwai lrmakxtr nzmncz-krbzlr mz Kraes.

25 X nimu ncblo kxnzyrlzng namrlztiamu olvz ngrmung, da kc tqwai Kraes nzmrlzti-krde lrmakxtr mz nzbz-krdeleng.

26 Bz-ngrde nidr murde na-alcngile nidr mz lue ngr nzwrkxtrngr x mz nzlxngiti-krdr natqde.

27 Murde lrmakxtr sa na-apule olvi kx nayrlzti Kraes kalr. X mzli ka sc tqatubqtile nide, murde natakitrde nide nztutr-krbzle mz mzte, mz nzngini-krde olvi kxluli, kxlqngipx, kxtr, x kxtubq-esz'ngr mz nzobq-krde, kx trtxpnzngr alwx ngrde x trpnzngr da kvz-rbrtrpz bade.

28 X nimu ncblo namrlztiamu olvz ngrmu da kc tqwai nzmrlzti-krmu nrkrdrtdqmu. Murde mz nzmnc-lxblrngr, ncblo kc tqmrlztile olvz rde mrlzti-lzbq kz.

29-30 X trpnzngr kx trkalr-ngrde nrkrdrtdqe. A' acive-angidrlle x aputrle dakxnzng, da kc tqwai Kraes nzaclve-krde nigu lrmakxtr, mz nzngini-krge nrkrdrtdqe.

31 Da kc tqwai nzpikr Nzryrngrkxtr le kx, *“Mzli kc ncblo x olvz tzetupe-ngrdr, nayrlzng. X nzamatq-lzbq-krdr namyaszpxle nzamatq-krdr kxnginidrng. X ncblo namnctr-amqngipebz mz olvz rde. Murde doa lcng li nznginipedr nrkrdrtdq*

x leplz kxesz'." ☆

³² X mz nqm̄q lcpwz Kraes ncd̄r lrmakxtr nid̄r nrkrdr̄tq̄ x leplz kxesz'. Krlc da kx myapxbz kx trkrlz-angidr̄kaku.

³³ Kxmule-esz', a' ncblo kxyrlz kxesz' namr-lztile olvz rde, da kc tqwai nzmrlzti-lzbq-krde. X olvz kxyrlz na-amatqle ncblo ngrde. ‡

6

Doa Kxnztopwzng Badr Trtedr X Lxedr

¹ Nimu doa kxnztopwzng, lxngitibzmu natq trtemu badr lxemu, murde avxctr-lzbqpebzmu mz Kxetu x krlc me pnz drtwrde.

²⁻³ Da kc tqwai nzpikr Nzryrngrkxtr le kx, *“Amrlue zvz trtem x lxem, murde na-amrlz Gct nim x namnc-zpwxq mz nrlc ka mzli kxboi.”* ☆ Krlc lou sc Gct ayrnrngr kx amnqlzle kc tqvzmi nzesalz-krde.

⁴ A' nimu trte x lxe doa kxnztopwzng, bzkq angyatibzmu drtwr doa nemung. A' acleve-angidramu x alvztr-angidramu nid̄r, murde navz-nqblqlr me pnz drtwr Kxetu mz nzyrlvzlz-krmlr.

Kxanzawzng X Kxnzetu Rdrng

⁵ Nimu kxanzawzng, navz-nqblqamu natq kxnzetu rmung mrka mz nrlc. X navzdzm mz nabzmu atwrnrngr nzamrlue-krmu nid̄r mz nzamatqngr, na-apule kx wztrpzmu mz Kraes.

☆ **5:31** Nou 2:24; Matiu 19:5; Mak 10:7-8; 1 Korint 6:16 ‡ **5:33** 5:25 Nivz lc ngi dalr nzrka-zvznḡr da, a' trngiu dalr nzrtwz-zvznḡr da. 5:33 Gct yrlqle nzyrlznḡr murde ncblo x olvz naokatr-lzbqnḡr mz nzyrlz-krdr. ☆ **6:2-3** Nzrlasznḡr 20:12; Lou Kcpwz 5:16

⁶ Bzsq wz-angidrtx-ngrpwzmu mzli kx nztulvz-ngrdr nimu kxnzetu rmung, murde naglqlz-ngrdr nimu. A' napq mz nabzmu nzvz-nqblq-angidr-krmu natqdr, mz nzapu-krmu kxnzwztr-pzng mz Kraes, murde krlc me pnz drtwr Gct.

⁷ Abrtlvzamu nzwz-krmu, na-apule kx wztr-pzmu mz Kxetu, a' trngiu ncblo.

⁸ Nadcpz mz drtwrmu kx Kxetu sa na-ayzlumle nzwz-krqu kxmrlz mz da kxmrlz, kxmule-esz' nigu kxnzawzng o trtingr.

⁹ X nimu kxnzetung, kx namusr-kz-ngrnamu kxnzawz nemung lcpwz. Bzsq rpibzmu natq kx naxngitrir x natq ngr nzviplangr nidr. Nadcpz mz drtwrmu kx nimu badr Kxetu rmu esz' kc Heven, x mz nzobq-krde leplz amrlx kxnzmu-tpwzlr esz'.

Dalr Vea Kx Kam Gct Bagu Mz Nzaovxio-krqu Setzn Badr Drka' Kztedeng

¹⁰ Natqngc kx nzrmnr-ngrbzng nidr seleng. Mnctr-amqngibzmu mz Kxetu rgu, murde narngiscmu zmatq mz nzaxplr-krde nimu.

¹¹ Vecku badr Setzn kc tqsutu drtwrde nzaovxio-krde nigu. Mz nzmu-krde lcde, yrlqzbzmu dalr vea amrlx kcng tqkabz Gct bamu, murde natu-amqngi-ngrnamu mzli kc Setzn na-atalz-ngrde x naesabrti-ngrde nimu.

¹² Mz vea lc trveckuu badr leplz. A' vecku badr drka' kxnzetung, kxnzrmailzng, x kxnzmatqng kcng tzmncng mrnyzdr. Murde sc tzrbatrpzng alwx x da kxtrka mz nrlc ka, mz nzrngisc-krdr zmatq kxdrka'ngr.

¹³ Mz nzmukrde lcde, mzli ka nayrlqbmzmu dalr vea amrlx kcng tqkabz Gct bamu, murde mzli kc navec-nrgu badr, natu-pz'li-ngrnamu nidr. X natu-amqngiamu nakrlzbzle mzli kc nayrkrpxngr nzvecngr lc.

¹⁴ Oliqti-lzbqamu mz nzngini-krmu ncblo ngr vea neng Gct. Murde ncblo ngr vea nzamqngitrir nrkalodr, murde naoliqng mz nzvecngr. X mz nqmqlcpwz, nzkriz-krmu da angidrng amrlx kx nzvzpxmqng mz Gct na-apule nrkalomu, murde naoliqamu mz nzaovxio-krmu nzpokianger amrlx. X ncblo ngr vea nzyrlqbzlr temz ngr lomrdr kc tqyrputrngr nipna, murde enqmi rdrng ma tzluplxtrpzlr lomrdr. Mz nqmqlcpwz, nzkriz-krmu kx tubqpebmzmu mz nzobqkr Gct na-apule temz ngr lomrmu, murde Setzn ma tqbatrpzle nztalvzokr nabzmu, mzli kc tqrpi-ngrbzle bamu kx vz-rbramu. ☆

¹⁵ X ncblo ngr vea nzyrlq-kzpzlr but ngr nanycdr, murde natu-amqngi-ngrdr mz mzli r vea. X mz nqmqlcpwz, nzkriz-krmu kx mncamu mz nrw badr Gct mz nzvz-nqblq-krde Nrpakxmrlz, na-apule but ngr nanycmu, murde natu-amqngiamu mz nzrlxngiti-krmu x mz nzipxkrbmzmu Nrpakxmrlz badr leplz.

¹⁶ X ncblo ngr vea nzaotr-kzng mz mqdr kxmc da kxmngi scdr kc tqyrputrngr nipna. Mz nqmqlcpwz nzbrtikr drtwrmu Jiszs, na-apule da kxmngi scmu kc tqyrputrngr nipna kxngc kc tqpnzng Setzn nimu mz nzatrkatikrde nimu. Murde nzbrtikr drtwrmu Jiszs sa na-amz-zvzbzle nipna kxngc sc Krkc Tqdrka'ngr amrlx.

☆ **6:14** Asaea 59:17

¹⁷ X ncblo ngr vea nzyrlq-kzpzlr abx ngr vea kc tqayrbqpxle nardr. X nzmale-kzlr toki r vea mz mqdr kxrtc mz nzvec-krdr badr enqmi rdrng. ☆ X mz nqm q lcpwz, nzkriz-krmu kx Gct arlapxpele nimu na-apule da kxm qngi kx nalalvzle narmu, murde nzao-krmu drtwrmu natubq x naopx, murde ma tqesabrti Setzn nimu. X nzkriz-krmu natq Gct x nzpipx-krbzmule na-apule toki r vea kc tqkabz Mqngrkxtr, nangi dalr nzaovxio-krmu Setzn.

¹⁸ X mz nzvec-krmu, krka'-zvz-ngrbzm mu mz Gct nzokatr-krde nimu. X mz da amrlx krka'-zvzamu navz-nqblqle kxmu nzpi-krbz Mqngrkxtr le mz nabzmu. Mz nzkrka'-krmu aclvetio-angidramu, murde drtwrmu bzkq ma mz nzkrka'-krmu leplz neng Gct amrlx mrkang kqlu. X bzkq esaki nzkrka'-krmu, navz nakrlzbzle mzli kx ayzlu-ngrbz Gct natqmu.

¹⁹ X krka'-kz-ngrnamu ninge, murde nakam Gct bange natqdeng mzli kznike naycmne-ngrne, x nelznge nabr, mz nzyokaetipx-angidr-krbo Nrpakxmrlz kc tqyc-kapqbz mz leplz.

²⁰ Kraes aprcmle bange nzwzkr menrpa nede mz nzyapwxtipx-krbo natqdeng. Dekc tzadwatrpe-ngrne mz presin. A' krka'-ngrnamu ninge, murde napipx-angidrbo mz nelznge kxbr.

Natq Ngr Nzarlz-lzbqngr

²¹ Atwzlr-ngrbo bamu Tikikzs, mzlegu kxnm-rlzti, kx wztr-angidrbz mz Kxetu rgu, murde nayapwxti-krizpwzle ninge bamu x da kx rtrngztibong.

☆ **6:17** Asea 59:17

²² X na-apqtrpzle drtwrmu mz nzkrly-krmu nrpa ngrgrng amrlx.

²³ Krka'-ngrne kx Trtegu Gct x Kxetu rgu Jiszs Kxnmcpx na-amnc-zpwxlr nimu badr mz nrw. X nabatrpzlr nzmrlzti-lzbq-krmu x nzbrti-zvzkr drtwrmu Kraes.

²⁴ X rlxti-kzpo mz Gct kx nakabzle zmrlz ngrde kxmyalz mz leplz amrlx kcng tzmrlztilr Kxetu rgu Jiszs Kxnmcpx mz nivz kc tqvztx alo.

Delape. Ninge *Pol.*

Nzryrngrkxtr Kc Ate Rut x Sam
The New Testament plus Ruth and Psalms is the
Natügu language of the Solomon Islands
Buk Baibel long langguis Natqgu

copyright © 2008 Wycliffe Bible Translators, Inc.

Language: Natqgu (Natügu)

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-17

PDF generated using Haiola and XeLaTeX on 28 Dec 2024 from source files dated 31 Aug 2023

fb2b7f06-e254-5fb7-b59d-ee21d5d7a93f